



TEZAU LITURGIC

31 IULIE

**SLUJBA
SF.MUCENIC
IURIE NOVIȚKI
DE LA
ST.PETERSBURG**



MOSCOVA, 2000



Служба св. новомученику Юрию Новицкому

На велицей вечерни

На Господи воззвах: стихиры предпразнства и святого, глас 1.

Подобен: Всехвальнии мученицы:

Прехвальнии новомученицы, святителю Вениамине, преподобне Сергие, богославные Юрие и Иоанне, торжествуем святую память вашу, вас бо не потопила ни вода безверия, ни буря ярости беззакония, ни ветры ересей, но Духом Святым просвещеннии, яко жертвы непорочныя Царю Славы принесостесь. Ему же молитесь о душах наших.

Никако же есть Дому Божию погибнути, аще и возстают нань преспевающие во злых, обаче не возмогут противитися Обетовавшему: созижду Церковь Мою, и врата ада не одолеют Ей. Темже и ты, премудре Юрие, немощная сих дерзости провидев, сам себе яко камение живо Христу предал еси, да примет тя, якоже древле Петрови, исповедание твое во основание положив, и на сем церкве Русския стояние утверждая, яже ныне прославляет тя.

Всехвальне Юрие новомучениче, за чистоту души твоея, увенча тя Владыка венцем славы вечныя, прияв твоя страдания и смерть, яко жертву всесовершенну. Темже и во светлостех небесных ныне ликовствуеши, Христу молящися, о спасении тя призывающих.

Слава, глас 4:

Звезда нам память твоя незаходимая, неподвижимая, Юрие досточудне страстотерпче, стези нам светом своим озаряющая, и пути незаблудныя указующая, на ню бо зряще, яко моределателие ладью поверяем, сердечныя наша помыслы, словеса и деяния, да в пристанище небурное окормимся недушевредне, ты молитвенника неусыпна о нас стяжавше.

И ныне:

Воссия нам спасения свет Рождшимся от Тебе, небо другое утробу Твою содела умных светов начальный Свет, к Нему же взирающе, молим Тя, яко Бога нашего Матерь, да не зайдет от очию нашею просвещение мысленное Вечнаго Живота.

Прокимен дне и чтения мученическая 3.

Пророчества Исаиина чтение.

Тако глаголет Господь: вси языцы собращася вкупе, и соберутся князи от них, кто возвестит

сия в них? Или яже от начала, кто слышана сотворит вам? Да приведут свидетели своя и оправдятся, и да услышат, и да рекут истину. Будите Ми свидетели, и Аз Свидетель, глаголет Господь Бог, и отрок, егоже избрах, да познаете, и веруете Ми, и разумеете, яко Аз есмь; прежде Мене не бысть ин бог и по Мне не будет. Аз есмь Бог, и несть разве Мене, спасаяй. Аз возвестих и спасох, уничижих, и не бе в вас чуждий. Вы Мне свидетели, и Аз Господь Бог. И еще от начала Аз есмь, и несть отъ рук Моих избавляяй; сотворю, и кто отвратит то? Сице глаголет Господь Бог, избавляяй вас святой Израилев.

Премудрости Соломоновы чтение.

Праведных души в руце Божией, и не прикоснется их мука. Непщевани быша во очесех безумных умерети, и вменися озлобление исход их, и еже от нас шествие сокрушение; они же суть в мире. Ибо пред лицом человеческим аще и муку примут, упование их бессмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле искуси их и яко всеплодие жертвенное, прият я. И во время посещения их воссияют и, яко искры по стеблию, потекут: судят языком и обладают людьми, и воцарится Господь в них во веки.

Надеющиеся Нань разумеють истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломоновы чтение.

Праведницы во веки живут, и в Господе мзда их, и попечение их у Вышняго. Сего ради примут царствие благолепия и венец доброты от руки Господни, зане десницею покрыетъ я и мышцею защититъ ихъ. Прииметъ всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Приимет щит непобедимый преподобие, поострит же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят. И от каменометныя ярости исполнь падут грады, вознегодует на них вода морская, реки же потопят я нагло. Сопротив станет им Дух силы и, яко вихор, развеет их. И опустошит всю землю беззаконие, и злодейство превратит престолы сильных. Слышите убо, царие, и разумеите, навыкните, судии концев земли. Внушите, держащии множества и гордящися о народах язык, яко дана есть от Господа держава вам и сила от Вышняго.

На литии стихиры, глас:

Книжников и закононозвавцев похвало и слава мучеников показался еси Юрие досточудне, крест бо Христов подвижнически восприявше, поприще мучения претекл еси, и со славою очищение самого себе мученически совершивше, яко чист сый Чистому предстоиши Христу, венценосче всеславный, со всеми новомученики Российскими веселящися, молися за нас ко Господу.

Юрия новомученика, приидите вернии вси почтим, пеньми и песньми духовными, сей бо мужеством препоясая, исповедник был еси крепок; и мучения венец светел восприим благодатию, Христа прославил еси.

Цвете прекрасный, Юрие богомудре, кровь твою честную за Христа излиал еси; темже от Вседержителевы руки подвигов почесть прият, украсися неувядаемого цвета сиянием.

Слава: глас :

В небесный вшед Чертог багряницею украшен, и Троице с велием сонмом новомучеников и исповедников ныне предстоиши, Юрие многострадальне, мы же днесь, память твою светоносную совершающе, прославляшаго тя Господа величаем.

И ныне.

Мученик лица Ты основание быти вменяют,
Дево, подвигу сих. У Креста Ти стоящей,
оружие пройде Твою непорочную душу, Юже
божественная Любы от рождества распали.

На стиховне, глас

Стих: Праведник яко финикс процветет, яко
кедр, иже в Ливане, умножится.

Христианския веры ревнителю, святоотеческаго
учения проповедниче и исполнителю, плоды
трудов твоих великих и многообразных Христу
принесл еси, Емуже и до смерти последовал еси.
Егоже ныне зриши в сиянии славы вечныя,
новомучениче Юрие богомудре.

Стих: Насаждени в дому Господни, во дворех
Бога нашего процветут.

Не скорбети, но радоватися повеле ближним
твоим, Юрие блаженне, егда призва тя Господь
последовати Ему страданием; аще гоним и
истязуем бе, всего себе в руке Владычни
предаде, телесныя раны превозможе силою
вседетельною Духа.

Слава, глас 6:

Кровию обагрив твоею ризы твоя, вшел еси во
святая святых, свят ты быв, Юрие славне,
мужественно страдания и смерть за Христа
приял еси, лествице и неистовство богоборческое

поправше, врага победил еси; темже тя молим:
укрепи молитвами твоими души наша.

И ныне, предпразднства:

Тропарь, глас 4:

На утрени

По 1-м стихословии седален:

Отвергнувся себе, верности Спасителю за ны
распятому мужественно страдания Правды
вечныя подъял еси, не убоявся прещения власти
богоборческия, исповедниче Христов Юрие
пречудне и богоносне; ни гонения бо, ни
темница не возможе отлучити тя от верности
Богови. Сему же и нас настави, страсотерпче
святой.

Слава и ныне.

По 2-м стихословии седален:

О новый угодниче и святительниче града
Петрова! Во узилище суще, борением
внутренним томим был еси, гефсиманстей чаше
приобщился еси, грехи своя голгофской желчию
очистил еси, и страданием мученическим в Бозе
сердце свое утвердил еси, ныне Пасху вечную
торжествуеши на небесех, содей и ны
общники веселия твоего.

Слава и ныне

По полиелеи седален:

Светло торжествующе празднуем память твою, святой Юрие, и верою исполняемся, яко не оставляеши нас своим попечением; предстояще незримо со святителем Вениамином и пострававшими с тобою купно Мученики Сергием, и Иоанном, моление сие приемлещи, предстательствуя о спасении поющих тя. Слава и ныне Предпразднства.

Прокимен, глас 4: Восхвалятся преподобнии во славе, и возрадуются на ложах своих.

Стих: Воспойте Господеви песнь нову, хваление Его в церкви преподобных.

Всякое дыхание: Евангелие от Луки, зачало 67. по 50 псалме стихира, глас :

От юности ученик Христов быв, апостольски проповедати слово Божие потщался еси, и якоже о тебе рече другом Христос: иже бо несть на вы по вас есть, темже верен Господу до конца пребыв, Христовым крещением крестился еси, сего ради и нам подаеши благодать твою, новомучениче Юрие.

Канон святому новомученику Юрию Новицкому (глас 4)

Песнь 1

Ирмос: Отверзу уста моя и наполнятся Духа, и слово отрыгну Царице Матери, и явлюся, светло торжествуя, и воспою, радуясь, Тоя чудеса.

Создателю Ангелов и света Подателю, Иисусе Христе, ум и сердца наша просвети, да достойными усты прославим подвиги верного Твоего, мученика и свидетеля Юрия, боярина благоверного, кровию своею землю нашу освятившего.

Цветы добродетелей носяще, отселе горних садов благоухание предвосхитил еси, в сих же ныне яко крин благоуханный, присно радостию цветещи неизглаголанною. Престолу ныне предстоя Христову, яко мученик преславный, Юрие всечестне, прими молитвы наша с любовью тебе возсылаемыя.

От юности благочестивыма сродники твоима наставляемый, возрастал еси, Юрие прехвальне, в премудрости Божественной и человеческой, сице просим тя: просвети разум наш светом истины, а души наша милосердною любовью преобрази, испрашая душам нашим от Христа мир и велию милость.

Богородичен: Бога без семени рождающая, паче ума человека, Дево Пречистая и Мати; Егоже моли помиловати поющих Тя.

Песнь 3

Ирмос: Твоя песнословцы, Богородице, живый и независтный источниче, лик себе совокупльшия, духовно утверди, в Божественней Твоей славе венцев славы сподоби.

Дар Богу, всеблаженне, тебе самага принесл еси, служением чадом страждущим и иныма дела милосердия, заботами о просвещении юных, истины научней приращении и ревности о Правде Христовой и благостоянии Церкви Его и всим житием твоим многотрудным и честным страданием, богосносне Юрие страсотерпче.

Усердно трудился еси, Юрие достославне, во всеучилище, иже во граде Петровом, к свету разума многих приобщая, правовед преизрядный, а послеже и святоотеческаго учения ревнитель и наставник богмудрый явился еси, сего ради просим тя: всеучилищу сему и всем истины взыскующим покровитель преблагий буди.

Победив века сего зломудрствование, в небесная возшел еси, непобедиме Юрие, победы

венец нося от вседержительных руки Божия,
моли от бед спастися тебе почитающим.

Богородичен: Утверждение буди и прибежище, и
покров Дево Пречистая, верою к Тебе
прибегающим, и любовью воспевающих
Рождшагося из Тебе.

Седален:

В незлобии Христу подражавый, истязания и
раны от татей кротко претерпе, Юрие
многострадальне, ныне же во славе со ангелы и
отцами Церкви предстоиши Слову Предвечному
и молишиися о спасении и благоденствии
нашем. Сице просим тя: не остави в молитвах
нас, дивный мучениче и скорый молитвенниче.
Твоему присному заступлению за ны пред
Господом дивящися, Тому хвалу по силе
приносим и тебе величаем, и молим: не остави
нас, покровителю наш благий и милостивый.
Слава и ныне.

Лето живота нашего прочее сохрани
неврежденно поможением Твоим, Дево
Отроковице, и сподоби конец благий получитьи
нам, воспевающим Тя и взывающим: радуйся,
Всеблаженная, Богородице Чистая, Одигитрие

Песнь 4

Ирмос: Седяй в славе на Престоле Божества во облаце легце, прииде Иисус Пребожественный нетленною дланию и спасе зовущия: слава, Христе, силе Твоей.

Утеснил еси нечестие, святче, пространством истинного благочестия, и пути в сие ведущия, показал еси, спасая души, потопляемые прелести богоборчества водами.

Падшаго естества возношение, Духом укрепляемь, поправ, мужественно облеклся еси багряницею нетления, Юрие новомучениче: темже прославляемь ангели и человеки.

Кровию страдания, блаженне, освятил еси землю, духом же на Небеса возшед, присовокупися гласу святых новомучеников, воспевающих Святую Троицу.

Богородичен: Просвети, Пречистая, омраченную душу мою светом Твоим, яже Свет рождающая Един Ипостасный.

Песнь 5

Ирмос: Ужасошася всяческая о Божественной славе Твоей, Ты бо, Неискусобрачная Дево, имела еси во утробе над всеми Бога и родила еси Безлетного Сына, всем воспевающим Тя мир подавающая.

Просиял на земли светлостію разума твоего, святыи Юрие, яко пчеле трудолюбой подобно нектар знаний отовсюду собирал еси, и умы юныя к оному усердно приобщи и воистину премудрости любитель искренний явися тем же и нас нерадивых любомудрию истинному научи, страсотепрче святыи.

Крест Христов житіем своим прославил еси, преславный Юрие, яко не убоялся еси хулителей и гонителей истины Божия, не устрашившись велений безбожных, на смерть свою яко на пасху Господню шествовал еси, и нас утверди в любви Божией твоими к Богу молитвами.

Душа твоя крепкая козни вражеская низложи, мрак неверия и лукавствия разгнася твердейшею верою твоею, Юрие всехвальне, новомучеников похвало. Ты бо смиряся оскорбляемъ, темницы и изгнания горечь претерпел еси, темже блаженную улучил еси, многострадальне, славу и светлость.

Богородичен: Иже образ Ипостаси Отчи, из Тебе прият смешение Богородительнице, и истлевший образ прослави, и сего нова сотвори.

Песнь 6

Ирмос: Божественное сие и всечестное совершающе празднество, богомудрии,

Богоматере, приидите, руками восплещим, от Нея рождшагося Бога славим.

Евангельски на земли пожити сподоби тя Христос Господь, Юрие богомудре, лестницею заповедей Его на Небо восход сотворити, нищетою духовною основание положив, радостию в поношениях навершил еси блаженства.

Искушаемь врага злобою, святче Божий, тяготу злобы человеческия чрез все житие Твое пронесл еси. В любви же Господней крепость обретаючи, вся претерпел еси яко воин Христов добропобедный, злобу человеческу любовию Божиею победил еси.

Чловецы на Господа и Церковь Его враждоваху иногда, и ты от тех претерпел еси муки многоразличныя, святой Юрие, на Спаса твоего Господа уповаючи, не посрамился еси, но низложил еси врага злобу, блаженне. Ликуеши ныне в небесных обителях веселящися, на Бога бо изрядным упованием сладость живота вечнаго стяжал еси и сонму святых Христовых соприсчислен еси

Богородичен: Вземлющаго грехи всего мира, Христа заченши, Пречистая, не престай просящи грехов прощения воспевающим Тя.

Кондак, глас

Срадуйтесь нам ангельские чины и святии вси, днесь бо празднуем память новомученика Юрия, подвиги земныма своима, дела милосердия страданиями правды Христовой ради Царствия вечнаго достигшаго, веруем, яко духом вкупе с нами пребывая, моление сие примет и Христу принесет, ходатайствуя о спасении нашем.

Икос

Во обители небесныя духом устремился еси, богоблажене Юрие, таже Господу усердно поработав живот вечный и блаженный унаследовал еси. Сего ради и мы тебе взываем: молитвенниче наш, не престай ходатайствующи за нас. Ты бо сладость живота вечнующаго в Бозе еще в земном житии твоём вкусил еси, мучениче, темже вся доблестно претерпел еси. Ликуй ныне во обителях райских, выну пред лицем Божиим веселяся. Темже вопием ти: Радуйся, рода именитаго отрасли благородная; Радуйся, лозо вертограда Христова богатоплодная; Радуйся, сословия дворянского преизрядное украшение; Радуйся, добрый и усердный последователю евангельского учения; Радуйся, благочестия предков твоих прехвальный сонаследниче ;Радуйся, от отрочества Иисуса Сладчайшего возлюбивый;

Радуйся, во дни юности твоея всю себе Ему
Единому посвятивый; Радуйся, светильниче
знания и благочестия; Радуйся, искоренителю
невежества и нечестия; Радуйся,
исповеднического подвига сияние прославивый;
радуйся, крест во дни гонений на Церковь
избравый. Радуйся, Христа распинаемого паче
жизни временныя возлюбивый; радуйся,
темницу, страдания и смерть за Него
претерпевый. радуйся, собору
новопрославленных святых Русских
причтенный. Радуйся, прехвальне и премудре
новомучениче боярине Юрие, заступниче и
покровителю наш многомилостивый!

Песнь 7

Ирмос: Не послужиша твари, богомудрии паче
Создавшего, но огненное прещение мужески
поправше, радовахуся, поюще: препетый отцев
Господь и Бог, благословен еси

Ни темница, ни ярость мучителей, ни
страдания, ни даже смерть не возмогли
разлучити тебе от любви Божией, тою
укрепляясь, воспевал еси: благословен Бог отец
наших.

Возмог еси Божиею вседетельною силою
богоборческие прелести вселукавое мудрование,
страстотерпче, победити, и венец нетленный от

всех Владыки прияти, поя: благословен Бог отец наших.

Воистину блажен ты, Юрие многострадальне, ибо сподобился еси соделаться общником страстей Христовых, себе самага в дар Зиждителю принося, вопиял еси: благословен Бог отец наших.

Богородичен: Радосте скорбящих и отчаянных, Ты еси Мати Преплагая, Спаса рождающая рода нашего.

Песнь 8

Ирмос: О^ттроки благочестивии в пещи Рождество Богородичо спасло есть, тогда убо образуемое, ныне же действуемое, вселенную всю воздвизает пети Тебе: Господа пойте дела и превозносите Его во вся веки.

Светом Божественным и благодатию Духа Святаго, благоухающе священная память твоя, всеблаженне Юрие, просвещает верных, созывающе воспети: Господа пойте, и превозносите Его во веки.

Ныне время торжества, ныне радость духовная явися, возвеселимся убо, Христоименитые людие, подвиг веры премудраго и благовернаго боярина Юрия восхвалим, вопиюше: Господа пойте, и превозносите Его во веки.

Приобщи и нас, грешных, вере твоей, святой Юрие, укрепи стопы наша на пути жизни христианской, содейлай нас неколеблемы от ветр нечестия, и научи нас Троицу Святую любить паче живота своего, да с тобою купно превознесем Ея во веки.

Богородичен: Столп крепости тверд, и степень, и Хранительницу, и Заступницу стяжавше Тя верою поюще: благословен Бог отец наших.

Песнь 9

Ирмос: Всяк земнородный да взыграется, Духом просвещаем, да торжествует же Безплотных умов естество, почитающее священное торжество Богоматере, и да вопиет: радуйся, Всеблаженная Богородице, Чистая Приснодево.

Возвышен явился еси страдании честными, приял еси венцы победы, и ныне в лике новомученик и исповедник Российских предстояще Престолу Троицы Всесвятыя и Нераздельныя, радуешься вечною радостью.

Ныне с Лики Ангельскими на Небесах предстоиши Владыце всех, исповедниче Христов Юрие премудре, и веруем, моляшися за скорьбми обуреваемый народ наш, да вера истинная и просвещение духовное вкорнятся в нем крепко

Наставниче и молитвениче наш, святой Юрие, с аввою твоим, святителем Вениамином и новомученики Сергием и Иоанном прииди, стани с нами; верою просящия тя спасай от всякия беды, Юрие блаженне, во Отечествии Небеснем пребываеши присно, яко мученик непобедим, днесь бо празднуем честную память твою.

Богородичен: Ты Едина Богу всяческая мудростию создавшему, Мати позналася еси Неискусобращная, Дево Пречистая. Темже Тя ангели и человецы песньми величают.

Светилен:

Ризы твоя, Юрие досточудне, кровию агнчей убелишася, страданием светло просветися лик твой, темже Христос венцем мученическим увенча тя.

Слава и ныне.

Ангелом пении Тя величающим человецы сподражати тщатся, аще и грешни есмы, немощное наше славословие от сердец возносимое не презри.

На хвалитех, глас

О преславнаго чудесе! Красуется ныне Церковь Русская, кровь святых мученик имуще крепкое утверждение. И церкви Божии сонму новых

российских мученик равночисленнии свет миру Христовой веры выну являют. Темже днесъ воспоим добраго Христова мученика, память его светло торжествующе, добропобеднаго и премудраго боярина Юрия.

О преславнаго чудесе! Всем сердцем болезнуя о церковной правде, путем трезвения духовнаго, благоговения, таин Божиих созерцания, чертога небеснаго достигл еси. Деяньми твоима и скорбей терпением Церковь украшается, чистотою исповедания нечестие посрамляется, словами и трудами вашими вера утверждается. Темже молим тя, всечестный Юрие, руководствуй в наших обстояниях нас, да тобою наставляеми и заступаеми, Царствия Небеснаго сподобимся.

О, Преславнаго чудесе! На небеси и на земли радость днесъ возсия в память святых мучеников петроградских: от Ангел хвалами венчаются, и от человек пения приемлют. О како во стране нашей истина утверждается, о како святые сия Богу угодиша, имиже враг паде лукавый, Христу побеждшу того.

Слава, глас и подобен тойже:

О преславнаго чудесе! Воспоим днесъ Христа Бога братие, во храме дивнаго страстотерпца Юрия сошедшеся, того бо имамы вернаго наставника, и заступника добраго, и любве

учителя, и премудрости Божией насадителя.
Того восхвалим.

На Литургии

Прокимен, глас 7: Восхвалятся преподобнии во славе и возрадуются на ложах своих.

Стих: Воспойте Господеви песнь нову, хваление его в церкви преподобных.

Апостол ко евреям, зачало 334. Аллилуиа, глас 2: Священницы Твои оденуты в правду, и преподобнии Твои возрадуются.

Евангелие от Луки, зачало 67.

Причастен: В память вечную:

